

人鏡陽秋卷二

明新都無無居士汪廷訥昌朝父編

忠部


戰伐類

無無居士曰時平則右縉紳有事則先介冑
兩者相提衡而用此薇杜之績不無衮職之
補也苟見以為無事形而弛之則一旦緩急
何以應故手板倒於廟堂斯干戈棄於原野
君人者其知所以用將哉乃裒古今戰事



呂望

文王田於渭陽卒見太公坐茅以漁文王以後
車載之而歸尊為師尚父傳太子蒞授丹書之
戒曰敬勝怠者吉怠勝敬者滅義勝欲者從欲
勝義者凶凡事不強則枉弗敬則不正枉者滅
廢敬者萬世太公所以事周雖異然要之為文
武師周文王之脫羗里歸與太公陰謀脩德以
匡商政文王崩武王即位九年東伐師行師尚
父左杖黃鉞右把白旄以誓曰蒼兕蒼兕總爾
衆庶與爾舟楫後至者斬遂至孟津諸侯不期
而會者八百武王曰未可還師居二年乃伐紂
無無居士曰太公以鷹揚之帥賈勇於龍戰
之郊紂以若林之旅無敢射車中之木主者
仁暴之軌殊也雖然太公陰謀尚矣而丹書
之戒與洪範同功誰云渭水飛熊眇於洛水
龜書哉宜乎賜履齊壇洋洋乎大國之風也



孟舒

漢田叔為漢中守文帝召叔問曰公知天下長者乎對曰故雲中守孟舒長者也是時孟舒坐虜大入雲中免帝曰先帝置孟舒雲中十餘年虜嘗一入孟舒不能堅守士卒戰死者數百人長者固殺人乎叔叩頭曰夫貫高等謀反天子下明詔有敢隨張王者罪三族然孟舒自髡鉗隨張王以身死之豈自知為雲中守哉漢與楚相距士卒罷敝而匈奴冒頓新服北夷來為邊寇孟舒知士卒罷敝不忍出言士爭臨城死敵如子為父以故死者數百人是乃孟舒所以為長者於是上曰賢哉復召孟舒為雲中守無無居士曰長者殺人乎然非長者不能多殺人孟舒不忍張王欲以身死之貫高慷慨受五毒以明張王不反可以俠稱而不可以長者稱舒以此聲游揚吳楚間豈空得耶觀後來不忍戰士卒而若驅之死臣奴者非不忍能如是乎故曰非多殺人不足見長者





趙充國

漢宣帝時諸降羌及歸義羌侯楊玉等劫畧小種背畔犯塞上使丙吉問誰可將者充國對曰亡踰於老臣者矣上遣問焉曰將軍度羌虜何如當用幾人充國曰百聞不如一見兵難踰度臣願馳至金城圖上方略上笑曰諾充國至金城上書陳兵利害言今先零羌楊玉此羌之首帥名王將騎四千及煎鞏騎五千阻石山木候便為寇罕羌未有所犯今置先零先擊罕釋有罪誅亡辜起壹難就兩害誠非陛下本計也於臣之計先誅先零已則罕开之屬不煩兵而服矣先零已誅而罕开不服涉正月擊之得計之理又其時也以今進兵誠不見其利唯陛下裁察帝報璽書從充國計焉後上屯田十二策羌人降詔罷屯田充國振旅而還

無無居士曰漢列四郡控制羌人斷匈奴右臂此誠大策然羌人種類不一不先因其降叛而為攻撫計則何足以復執事之踦哉充

國之擊先零而置罕羗非凡所見宣帝並從
其議自是湟中無憑陵而金城可息肩矣誰
謂罕禾海上猶有匈奴窺伺哉宜其振旅還
朝而勒功昆山仄也






鄧禹

漢鄧禹字仲華光武以禹沉深有大度拜為前將軍遣西入關遂破箕關圍安邑斬更始大將軍樊參更始將王匡等復合軍十餘萬擊禹禹軍不利會日暮諸將皆勸禹夜去不聽明日癸亥匡等以六甲窮日不出禹得更理兵勒衆明日匡悉軍攻禹禹令軍中無得妄動既至營下因傳發諸將鼓而並進大破之遂定河東時三輔連覆敗赤眉所過殘賊百姓聞禹師行有紀皆望風相携負以迎軍降者日以數千禹所止輒停車駐節以勞來之諸將勸禹攻長安禹曰不然今吾衆雖多能戰者少赤眉新破長安鋒銳未可當也夫盜賊群居無終日之計財穀雖多變故萬端寧能堅守者也吾且休兵北道以觀其敝乃可圖也已而赤眉西走扶風禹乃至長安大饗士卒因循行園陵為置吏士奉守焉無無居士曰雲臺首鄧禹者定大策也而以諸將汗馬較非知禹者也然仲華之行師卒

以大義勞來老稚循行園陵當時神人胥慶也久矣及權爭柁邑兵走宜陽光皇諒其情諸將諱其短者識其所得者大也噫九縣颺迴三光霧塞此何時也而仲華功據元侯有故哉有故哉






諸葛亮

漢諸葛亮字孔明琅琊人初在南陽時劉備凡三往乃見因屏人與語亮曰曹操挾天子以令諸侯此誠不可與爭鋒孫權據有江東國險而民附此可與為援而不可圖也荊州乃用武之國而其主不能守此天所以資將軍益州民殷國富劉璋闇弱不知存恤智能之士思得明君將軍既帝室之胄若跨有荊益保其巖阻撫和戎越結好孫權則霸業可成漢室可興矣備稱善與亮情好日密後即皇帝位立為丞相繼事後主亮率諸軍屯漢中以圖中原臨發上疏曰先帝創業未半而中道崩殂今天下三分益州疲敝此誠危急存亡之秋也誠宜開張聖聽以光先帝遺德恢弘志士之氣不宜妄自菲薄引喻失義以塞忠諫之路親賢臣遠小人此先漢所以興隆也親小人遠賢臣此後漢所以傾頽也臣本布衣躬耕南陽先帝不以臣卑鄙三顧臣於草廬之中諮臣以當世之事由是感激遂

許先帝以驅馳後值傾覆受任於敗軍之際奉命於危難之間先帝知臣謹慎故臨崩寄以大
事受命以來夙夜憂懼恐付托不效以傷先帝
之明故五月渡瀘深入不毛今南方已定兵甲
已足當獎率三軍北定中原興復漢室還於舊
都此臣所以報先帝而忠陛下之職分也今當
遠離臨表涕零不知所言云


無無居士曰草茅一言鼎足三分孔明真識
時務之後傑至跨有荆益後荆兵向宛洛益
衆出秦川孰謂孔明安於鼎足哉惜乎上將
蹶兵阿蒙譎黷遺恨在吞吳而國賊不討失
一大機會固非草茅之言不驗良由廟堂之
籌失算爾厥後秦川六出孔明志雖酬柰天
心已去何悲夫





韋叡

魏中山王英與將軍楊大眼等衆數十萬攻鍾離梁昌義之守之隨方抗禦魏人攻而死者與城平梁武命韋叡救鍾離受曹景宗節度人畏魏兵盛多勸叡緩行叡曰鍾離鑿穴而處負戶而汲車馳卒奔猶恐其後而况緩乎魏人已墮吾腹中卿曹勿憂也旬日乃進頓郟陽州叡塹洲為城去魏城百餘步馮道根能走馬步地計馬足以賦功比曉而營立英大驚曰是何神也景宗等噐甲精新軍容甚盛魏人望之奪氣楊大眼勇冠軍中來戰所向皆靡叡結車為陣大眼聚騎圍之叡以彊弩二千一時俱發殺傷甚衆矢貫大眼右臂大眼退走明旦英自帥衆戰叡乘素木輿執白角如意以麾軍一日數合英乃退復夜攻城飛矢雨集軍中驚叡於城上厲聲呵之乃定景宗攻其北叡攻其南忽淮水暴漲六七尺叡使馮道根等乘艦擊魏洲上軍盡殪軍人奮勇呼聲動天地魏軍大潰英脫身走

大眼亦焚營去水死者十餘萬斬首亦如之
無無居士曰元英搃戎大眼折衝依然佛狸
旗鼓也奚有鍾離哉幸而韋叡受脤遠脩疆
場蜂尾螳臂一掃去之鍾離竝然無恙固知
師克在和其胸中長筭眼底無全牛矣身乘
亦與手執如意武侯之度也魏人謠曰不畏
蕭娘併呂姥但畏合肥有韋虎咋舌哉







郭子儀

唐代宗時吐蕃遇回紇合兵圍涇陽郭子儀嚴備不戰時二虜聞懷恩已死爭長不相睦子儀使牙將李光瓚說回紇欲與共擊吐蕃回紇不信曰郭公在此可得見乎光瓚還報子儀遂與數騎出回紇大驚大帥藥葛羅執弓注矢立於陳前子儀免胄釋甲投鎗而進諸酋長皆下馬羅拜子儀亦下馬前執藥葛羅手讓之曰汝回紇有大功於唐唐之報汝亦不薄柰何負約深入吾地背恩德而助叛臣乎且懷恩叛君棄母於汝何有藥葛羅曰懷恩欺我言天可汗已晏駕令公亦捐館我是以來我曹豈肯與令公戰乎子儀因說之曰吐蕃無道所掠之財不可勝載馬牛雜畜長數百里此天之賜汝不可失因取酒與其酋長共飲子儀執酒酌地曰大唐天子萬歲回紇可汗亦萬歲兩國將相亦萬歲有負約者身隕陣前家族滅絕遂與定約而還吐蕃聞之夜遁

無無居士曰郭令公當肅代間駿烈彌區鴻
名播甸縉紳悉瞻眉宇酋長慣識姓名唐室
再造大抵皆其功也然功名之際難處哉令
公功愈高而心愈下閑廢則挑蹊擁篲錄用
則榆塞揚鞭故去來無芥於懷及單騎見虜
而下藥葛羅之拜中國息肩矣茲役也社稷
之功




李光弼

唐朔方節度使李光弼移軍向史思明賊將劉龍僊挑戰慢罵光弼裨將白孝德請挺身以取光弼撫其背而遣之孝德挾二矛策馬亂流而進龍僊易之慢罵如初孝德瞋目大呼運矛躍馬搏之城上鼓譟五十騎繼進龍僊走堤上孝德追及斬之以歸光弼屯中潭移軍河陽登城望曰賊兵多而不整不足畏也不過日中保為諸君破之乃命出戰令諸將曰爾輩望吾旗而戰吾颯旗緩任爾擇利吾急颯旗三至地則萬衆齊入死生以之少退者斬又以短刀置鞞中曰戰危事吾國之三公不可死賊手萬一不利諸君死敵我自到不令諸君獨死也再戰光弼連颯其旗諸將齊進致死呼聲動天地賊衆大潰思明及摯皆遁去

無無居士曰河陽之役國家安危所係白將軍固為首功至降高李二將厥績更奇賊已為之奪氣且颯旗置刀誓衆死敵所以廓妖

氛而朗日月者臨淮戰無遺力也嗚呼露布
軍前抽丁籍後余誦石壕村詩而痛趨役河
陽者慘矣天寶之亂誰致哉







裴度

唐裴度字中立元和和中同平章事時討淮西四年不克宰相李逢吉執言師老財竭意欲罷兵度獨無言上問之度曰臣誓不與此賊俱生今請自往督戰諸將恐臣奪其功必爭進破賊矣上悅從之將行言於上曰臣若滅賊則朝天有期賊在則歸門無日上為之流涕比至李祐言于李愬曰蔡之精兵皆在洄曲守州城者皆羸卒可以乘虛直抵其城比賊將聞之元濟已成擒矣愬然之遣人白裴度度曰兵非奇出不勝常侍良圖也愬夜襲蔡州擒吳元濟檻送京師屯兵鞠場以待裴度度入蔡州李愬具橐鞬出迎拜於路左度以蔡卒為牙兵或諫曰蔡人反側者尚多不可不備度笑曰元惡既擒蔡人即吾人也又何疑焉蔡人間之感泣無無居士曰余讀平淮西碑知諸將戰之力尤知裴丞相總戎之勲也夫冒雪夜深入鵝鴨混軍聲常侍之謀信奇非度決策請行則

武功不可究功不可究蔡人猶然頑冥也豈
識生民之樂哉及度徃鑿士飽而歌馬騰於
槽各順性命矣其文曰凡此蔡功惟斷乃成
信然哉





曹彬

宋開寶七年曹彬奉詔伐江南先赴荆南發戰艦潘美帥步兵繼進彬破硤口砦進克池州及當塗蕪湖二縣駐軍采石磯作浮梁跨大江以濟師大破李煜軍於白鷺洲師進次秦淮水陸十餘萬陳於城下大破之俘斬數萬計金陵受圍城垂克彬忽稱疾不視事諸將來問疾彬曰余之疾非藥石所能愈惟諸公克城之日不妄殺一人則自愈矣諸將許諾明日城陷煜與其臣百餘人詣軍門請罪彬慰安之君臣卒賴保全而江南悉平

無無居士曰宋下江南曹武惠以不殺稱後主之宗獲全信如時雨之師矣然宋待諸降王頗厚獨恠太宗不能全武惠之仁也夫後主閑於詩詞以錢侂較之殊非等倫然玉樓雲雨隔太祖尚不殺而煜死於小樓昨夜又東風之句寃哉孰謂宋待降王以不殺耶





岳飛

宋岳飛字鵬舉湯陰人自少負氣節好讀左氏春秋孫吳兵法初從留守宗澤戰開德曹州皆有功澤大奇之澤卒金人入寇飛與之戰既暮士卒乏食諸將欲潰飛厲衆曰我輩荷國厚恩當以忠義報國詞色慷慨士皆感泣奮戰賊皆望風先遁高宗手書精忠岳飛四大字製旗賜之是時兀朮粘罕屢入寇飛皆破走之自燕以南南金人號令不行兀朮欲簽軍以抗飛河北無一人從者飛大喜語其下曰直抵黃龍府與諸君痛飲爾秦檜以飛不還終梗和議一日奉十二金字牌令班師飛東向再拜曰十年之力廢於一旦乃還檜遣使捕飛誣以罪飛裂裳以背示中丞何鑄有盡忠報國四字深入膚理鑄明其無辜檜付飛獄即報死諸酋聞飛死酌酒相賀

無無居士曰嗚呼飛之死虜死之耶檜死之耶抑帝死之耶語云非虜非檜直帝死之也

夫不欲帝而北者虜之私也飛方北抵黃龍
府不欲二聖南者帝之私也飛方挽北狩以
南轅二私挾均假手於檜焉虜不能得之檜
而帝直得之余故云帝殺之也噫此誅心之
法而檜不足責云





徐達

國朝中山王徐達鳳陽人扈上渡江定江南
洪武初以大將軍率師北伐所過戢兵守禦規
畫足食兵不民擾齊魯既平乃渡河至大梁父
老壺漿以迎西下洛陽長驅崤函直抵潼關拔
之元主開北門遁去不戰而克達籍府庫收板
圖寶器禁飭軍士人民安業市肆不易遠近悅
服人謂曹彬下江南伯顏入臨安不過是也

無無居士曰中山王平定江南擒吳殲楚功

一丹莫儔要以不嗜殺得人心故北伐中原檄
文到處兵若甘雨隨之不戰而克茲勝國猶
驅而縱之沙漠也夫戮咸陽殪牧野唐高尚
不忍聞况迥出李唐萬萬者肯為蒲山公之
為哉至謚元主為順帝而

高皇帝多中山之不殺可知矣於都哉所以能
一天下歟

國

